

1509 bus & plebe ad bellum idonea civitate, magnam ea res perturbationem afferebat: quam tamen sublevabat, Patres certiores esse factos, aquam Silis fluminis, quod non longe ab oppido multis fontibus largiter ex terra exit, posse munitionibus adeo sustineri, ut quingentos eoque amplius circa oppidum passus majori ex parte ager sub aqua redigatur, ne hostibus ad murum accedendi facultas sit: easque munitiones prope confectas esse. Maximilianus autem, sive id nunquam in animum induxerit, sive desperarit posse ad exitum perducere: exercitus sui partem ad eam agri Patavini regionem, quæ ad Fossam Clodiam mareque pertingit, fertilissimam scilicet pecorisque plenissimam, quod sua illo reliquarum regionum homines armenta contulerant, prædatum misit. qua ex re tanta agrestium multitudo cum conjugibus ac liberis, cumque ea, quam subito abripere secumque ferre supellectilem potuerunt, missis ad eos publice naviculis, fuga se in urbem contulit, loca ut publica omnia porticusque ac fana & privata domus plurimæ ea turba conplerentur. Iis Senatus reipublicæ pecunia commeatum dari iussit, quoad hostium discessu liberum illis reverti domum fuit.

Patavina
expugnatio.

Post hæc ad Medoaci munitionem, quæ cymbæ ad urbem transmittuntur, omnesque ad illud vadorum urbanorum latus hostes plurimas incursiones multis & illatis & acceptis detrimentis cum fecissent, castra quamproxime potuerunt ad muros Patavinos a septentrionibus posuerunt, & tormentis oppidum quater verberareque cœperunt: tametsi a militibus reipublicæ haud parva cum clade repulsi sæpe fuerint. Maximilianus ipse in templo Carthusiano, quod templum oppidani non diruerant, medio fere castrorum spatio confedit. Erat ab ea regione portæ oppidi proxima turris terrea muro conjuncta, sed in agrum exporrecta, quantum ejus spatium in latitudinem patebat, pedes prope quatercentum: quam magna celeritate ac diligentia imperator legatique excitari mandaverant, ut esset toti ei lateri contra hostium exercitum munitio ad eorum impetus repellendos: ad eamque conficiendam non agrestes